

‘Zahid terima cek RM6 juta’

Saksi ke-91 dedahkan kejadian ada kaitan kontrak membekalkan cip pasport Malaysia

Oleh NOOR AZLIDA ALIMIN

KUALA LUMPUR

Pegawai Suruhanjaya Pencegahan Rasuah Malaysia (SPRM), Mohd Hizar Farhan Abdul Razi memberitahu Mahkamah Tinggi di sini pada Khamis bahawa bekas Timbalan Perdana Menteri, Datuk Seri Dr Ahmad Zahid Hamidi menerima dua cek daripada Timbalan Pengarah Urusan Datasonic Group Berhad (DGB) berjumlah RM6 juta.

Saksi ke-91 kes rasuah, pecah amanah dan pengubahan wang haram membabitkan Ahli Parlimen Bagan Datuk itu berkata, ia berlaku selepas insiden kekurangan pasport pada tahun 2016.

Mohd Hizar Farhan berkata, Timbalan Pengarah Urusan DGB, Chew Ben Ben pernah dipanggil pada 16 September tahun yang sama.

“Ben Ben diminta hadir ke kiediaman rasmi Ahmad Zahid di Seri Satria,



FOTO: BERNAMA

Ahmad Zahid (kiri) hadir pada prosiding sambung bicara kesnya di Mahkamah Tinggi pada Khamis.

Putrajaya dan selepas perjumpaan itu beliau menyerahkan dua keping cek berjumlah RM6 juta kepada tertuduh.

“Cek itu ditandatangani oleh pemilik syarikat Sarana Kencana Sdn Bhd (SKSB) yang juga Pengarah Datasonic Teknologi Sdn Bhd (DTSB), Datuk Abu Hanifah Noordin,” katanya.

DTSB yang juga anak syarikat DGB sebelum ini menerima kontrak untuk membekalkan cip pasport Malaysia bagi tempoh lima tahun atau 12.5 juta cip bermula dari 1 Disember 2016 hingga 30 November 2021 bernilai RM318.75 juta.

Dalam pada itu, ketika menjawab soalan daripada peguam, Datuk Ahmad Zaidi Zainal, Mohd Hizar Farhan

bersetuju bahawa Ahmad Zahid tidak melanggar prosedur berhubung isu permohonan pembekalan cip pasport pada tahun tersebut.

“Saya dapati bahawa Ahmad Zahid adalah Menteri Dalam Negeri dari 16 Mei 2013 sehingga 9 Mei 2018.

“Selaku menteri, Ahmad Zahid telah mengarahkan Ketua Setiausaha Kementerian Dalam Negeri (KDN) untuk mengambil tindakan ke atas surat-surat daripada DGB,” katanya.

Beliau berkata, ia membabitkan surat permohonan untuk pembekalan cip pasport selama lima tahun atau 12.5 juta cip yang akan dimasukkan ke halaman Biodata Polycarbonate Pasport Malaysia.